



**Ulloq 1. januar 2015 inuit A-nik isertitallit sulinermit ilanngaammik pisaleqqullugit Naalakkersuisut akileraartarnermut inatsimmik allanngortitsinissaq aningaasalersuinissarlu pillugit nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat Inatsisartut 2014-mi ukiakkut ataatsimiilerpata saqqummiuteqquneqarpoq, sulinermit ilangaaammik eqqussinerup aningaasatigut kingunissai 2015-mut Aningaasanut Inatsit pillugu aalajangiinissamut atatillugu pingaarnersiuisoqalerpat ilanngunneqarsinnaaqqullugit.**  
(Inatsisartunut ilaasortaq Andreas Uldum, Demokraatit)  
(Siullermeenera)

Suliffissaaleqisut amerlavallaarput. Inuusuttut suliffeerussimasutut nalunaarsorneqarsimasut annilaarnarsisutut aamma oqaatigisariaqarlutik. Pisoq aarlerinarsivoq, pisariaqarluinnarporlu ataatsimoorluta iliuusissanik ujarleqatigiittariaqartugut, suliffissaaleqineq ataavarnerusumik appartinneqassappat.

Naalakkersuisut kommunellu massakkorpiaq iliuusissanik suliaqarlutik aallartereerput, siunertaalu tassaavoq suliffissaaleqinerup appartinnissaa, taamaattoq Demokraatini pilersitsiniarnermut iliuusissanik amigaateqarluinnarpugut, ungasinnersusooq eqqarsaatigalugu suliffeqartitsinnaalluurtunik. Maannamut suliniutaasut, suliffissaaleqineq piffissaq qaninnerusooq isigalugu appartinniarlugu suliniutaapput.

Matumani sulilluni akileraarnermut ilanngaataasinnaasussatut siunnersuutaasup atuutilissappat, sulilluni akilersinnaalluarnarunissaa anguneqassaaq. Akileraarnermut ilanngaataamaallaat innuttaasunut sulisartunut atortinneqarsinnaassaaq, pineqartullu inuiaqatigiinni inissimanerminni ullumikkumut naleqqiullugu akissarsiassaat annertunerujussuussapput. Tamanna aamma ima kinguneqassaaq, ullumimut naleqqiullugu innuttaasunut suliffissaaleqisunut kajumissaataanerulluni suliffittaarnissaminnik immikkut suliniuteqalersitsinnaammat.

Taakkartorneqartut saniatigut Demokraatit sulitilluni akileraartarnermut ilanngaataasussamut tunngavilersuutigineqartut tapersorsorpaat. Siunnersuuteqartup tunngavilersuutigisaattut tunngavilersuinera malillugu.

Taamatut oqaaseqarluta siunnersuut Inatsisartut Aningaasaqarnermut Akileraartarnermullu Ataatsimiititaliaannut innersuupparput.